

福省序卷
目錄



亥 11
6
共 48 册

古今醫統序

予嘗謂造化者萬物之司命君人者三才之司命典
校者文章之司命將帥者三軍之司命而醫也者又
自天子以至庶人者之司命也其所關係豈淺鮮哉
故先儒有云不明五運六氣檢徧方書何濟不明十
二經絡開口動手便錯而孫思邈亦曰不明陰陽者
不足謂之太醫旨哉斯言誠業是業者所當深切究
心者也予獨恠今時之醫始無見理之明終無應變

之巧務竒詭者或遠慕而近遺局方書者或舉一而
廢百此虛實損益之間不免毫釐千里之謬而醫之
禍人不為少矣亶其然者則攷索未精體玩未熟與
聞見之未廣耳新安徐東臯氏潛心斯道者殆三十
年其活人不可以千萬計嘗謂予曰醫之精髓奧竅
內經一書備之嗣是人殊代異門徑雖多要不能出
乎此譬諸峙者皆山而泰岳則其宗也流者皆水而
滄溟則其元也然自非綜博千古參伍諸家旁搜曲

證又烏知內經有無總條貫之妙耶此醫統之編所以不容已也予取而讀之見其條分縷析隨論折衷如網之在綱如領之在裘俾學子一舉而免顛倒紊亂之弊題之曰古今醫統是真能會百家之異同接軒岐之正脉雖謂此書之外無醫可也昔仲尼集羣聖之大成朱子集諸儒之大成若徐君亦可謂集醫家之大成矣所以登斯世斯民於春臺壽域之中厥功固不偉歟雖然下學可以言傳上達必由心悟徐

君以明醫重京師齊驅襄扁奴僕劉張無險夷難易
隨試而輒効者則運用之妙存乎一心而醫統又其
緒餘也是在學者之自得焉耳知言者以為何如

欽差提督漕運鎮守淮安地方總兵官太子太保

靈璧侯古濠湯世隆撰

古今醫統序

古今醫統四十帙釐為百卷祁徐君春甫所裒輯上
自太昊炎黃迄於我

明本原醫經藥品禁方諸名家論著旁及經史

國典諸雜家言凡二百七十餘家二百八十餘部區別
類從鉅纖舉斯已勤矣徐君為人誠壹長者操術
慎而用志精其為醫先調護而後攻伐不捷出以為
奇不亟效以為快遨遊諸公卿間雖綿疴沉痾能終

任之迄以無害庶幾哉孔子所謂有恒者乎故其博
考遠稽折衷辨正若斯之勤也余讀諸史藝文志醫
家者流為書無慮數百種蓋其詳哉然古經微義逸
者過半而新義鑿說日益多始學眩亂莫適為準又
古文玄奧驟難句讀於是竊取晚近以偶幸一中而
軒岐諸書往往束而不觀即號稱名醫間叩以運氣
脉候及俞穴所居輒愕眙口噤夫醫非小道也立生
民之命贊天地之功其惟醫乎古聖代作辨百藥性

味自神農原百病起瘡自軒帝制湯液七劑自伊尹
乃其傳自內經內經衍於秦越人為八十一難漢興
倉公傳其學史稱脉書即內經藥論者本草也下及
南陽仲景益著蓋徐君有言譬之儒家內經尚矣斯
醫之六經乎本草其爾雅也南陽河間東垣其四子
書也惟是六七家言是謂本業儒不習本業不可為
儒醫不習本業不可為醫今世祖難經脉訣與內經
等宗高平義烏與南陽諸家等徐君不然獨違眾而

發其謬謂今醫學壞於難經脉訣難經所引多非素
問靈樞本文而意旨相矛盾脉訣誤以大小腸屬兩
寸而下部藏脉乃越關而上此皆後人所托名甚非
秦越人王叔和之本書然脉訣之謬本叔和脉經啓
之夫脉誤則謬治未有不誤者故世宗高平非也彥
修誦法南陽河間東垣能讀三家書而不知合變蓋
其用藥執泥如士人用帖括耳故世泥義烏亦非也
大都徐君上下數千載壹準於內經以律諸名家合

經者宗之悖經者斥之故其書首內經要旨次羽翼
內經者次脉候次運氣次經穴次鍼灸然後及內外
諸證治婦女老弱奇病秘方為說甚具而以本草集
畧及養生家言終焉要在明內經之旨正炎黃之統
使軒岐問荅千古如存其他解肌搗髓撰荒瓜幕浣
胃滌藏神術也存而不論巫祝馬鈴楮書高訣趙要
彭編異說也削而不錄總統百家以歸內經此徐君
醫統之所為作也蓋有恒者之效也

賜進士詹事府詹事兼翰林院侍讀學士前太常寺卿
兩京國子監祭酒司經局洗馬

經筵日講官知

起居注同修

國史

會典副總裁郡人潁陽許國書

許國書

潁陽

潁陽

古今醫統序

天下之治方術者亦異於古之道矣古者人專師師專法累功而就業曆試而嘗效故挾策寡而取用宏彼精於已無藉於外也乃後世不然矣臨病而攷治按方而索功彼之不効則此之是求嗟嗟以余觀於今天下盡然而獨醫乎古者人專師師專法師秘而不忍傳學者久而後可得然且齋戒以將之盟誓以信之誠而聽之終而守之其治人也壹意攝志固敢貳參故病者之聽

夫醫猶聽神明正反從逆惟其所用至割皮解肌浣腸
剗骨不惜醫誠良而聽之誠是也今醫師偏天下而不
攻學者亟求食而不能盡其術病者疑信半而姑聽命
焉而又以好全惡危之心待之病非在皮膚而効求於
旦夕旦不効旦更夕不効夕更而醫不敢聚毒以盡其
技況敢言割皮解肌浣腸剗骨之難乎故天下不尊醫
而醫亦不自尊急而求醫醫亦急而求術夫然後貴於
畜方曰吾其方非吾方上古聖人之方故病者即不信

醫信上古聖人而醫亦不至妄投一劑以禍天下故古
之藝精而試今之藝試而精古之人法治病今之人病
合法古之法宜簡今之法宜繁亦勢然已徐君之作醫
統也上自黃帝岐伯俞跗和緩倉扁和佗叔和仲景之
書下逮曲巷小師之技裒稽欲盡一病而狀百變一藥
而効百試此之一法而又有彼之一法者存使天下之
治方術者就資而就給精思而慎發借無十全亦寡失
耳故余謂徐君有功于今也徐君新安人名春甫今為

太醫之官太師成國朱公客之公卿皆名其術始徐君
行四方挾書多其在京師會

國家有大編摩公卿得觀秘書故聚方滋富然徐君所治
病有妙巧病已輒自紀所以治滿几閤矣而未嘗膠方
此長安所以名徐君哉

賜進士翰林院 國史檢討纂脩

世宗實錄從仕郎句甬蛟門沈一貫撰

古今醫統序

余蓋讀黃帝書云若窺深淵而迎浮雲一何難究哉
夫人之所病病疾多醫之所病病道少古人屬意甚
微窮力甚久其術洞鬼神含造化至精矣猶然噤咤
唯盱蓋其慎也周之時醫師隸于冢宰歲終有稽十
而失一即次其食未必入鏡于道乃斤斤守法論究
經脉五診竒胲不敢以墮有足尚焉後之業醫者較
視之何如哉靈蘭石版既未有能名其說專家授受

者藥性脉理病機治法尚茫如而乃肆炮縱合以規
偶中之利又未有以稽其失者師無所承憲無所畏
以眇微幽眇不可致思之術而滅裂若此為吁其可
慨矣吾邑東臯徐君少時學儒去學醫攻探研極究
尋諸名家謂淳于意以醫狀王叔和以脉經錢乙以
五藏方楊士瀛以直指論劉完素以原病式羅益以天
衛生寶鑑類不可勝數然人各師其見家各顯其方
辭說叢行則譯道難簡牘浩汗則裒稿難機指甲乙